



曹子建集

槃廬藏書





刻曹子建集序



昔仲尼脩述詩書之指而三代逖絕  
矣然論者猶有取於漢魏焉乃余觀  
兩漢去古未遠讀紀傳之篇誦郊廟  
間巷之歌愾焉猶想見其人各懷剖  
劘澗澗乎可爲經學之次也又下論  
於魏鄴中數子文學特茂若曹子建

之徒鍾參軍曰曹劉文章之聖陸謝  
體貳之才今集中五言詩及賦表等  
作是爲建安之冠也鏗鏗乎古之遺  
聲也耶宛而不驗質而不靡蓄而不  
虛節而不巧幽憤而有餘悲其可謂  
古之遺聲也已夫入戶升堂務學之  
大限也究原作者未有祖漢氏之風

而不本之魏也耶然陸平原謝康樂  
二子則又並祖於子建夫詩風也風  
之被于草木聲斯動焉陳思才氣慷  
慨本末協則卓追漢奧庶爲近之已  
視彼騁虛靡雅絢采蕩真者其何如  
哉雖然積忠秉貞憤切世用窘束藩  
遷惓惓焉多思京之哀矣獨文明不

諒乎哉阨其施而竟殞滅之也不可  
不謂之非天也耶尚賴定著凡作者  
咸鑒祖焉詎不式風百世矣乎按景  
初中植著凡百餘篇隋爲三十卷今  
卷止十詩文反溢而近二百篇郭子  
萬程雅好是集遂姑仍之刊布以傳  
焉吳郡徐伯虬謹序

曹子建集目錄

魏陳思王曹植撰

卷第一

東征賦 并序

遊觀賦

懷親賦 并序

玄暢賦 并序

幽思賦

節遊賦

感節賦

離思賦 并序

釋思賦 并序

臨觀賦

卷第二

潜志賦

閒居賦

慰子賦

叙愁賦 并序

愁思賦

九愁賦

娛賓賦

愍志賦 并序

歸思賦

靜思賦

卷第三

感婚賦

出婦賦

洛神賦 并序

愁霖賦

喜霽賦

登臺賦

九華扇賦

寶刀賦 并序

車渠椀賦

迷迭香賦

大暑賦

卷第四

神龜賦 并序

白鶴賦

蟬賦

鸚鵡賦

鶡賦 并序

離繳鴈賦 并序

雀鷄賦

蝙蝠賦

芙蓉賦

酒賦

槐賦

植橘賦

述行賦

卷第五

公宴

侍太子望

七哀

鬪鷄

元會

送應氏 二首

雜詩 六首

喜雨

離友 并序

應詔

贈徐幹

贈丁儀

贈王粲

贈丁儀王粲

贈白馬王彪

贈丁翼

朔風

矯志

閨情 二首

三良

責躬

情

妬

芙蓉池

雜詩

言志

七步詩

卷第六

篋篋引

升天行 二首

仙人篇

妾薄命 二首

白馬篇

名都篇

薤露行

豫章行 二首

美女行

艷歌

游仙

五游詠

梁甫吟

丹霞蔽日行

怨歌行

善哉行

君子行

平陵東

苦思行

遠游篇

吁嗟篇

鰕鮒篇

種葛篇

浮萍篇

惟漢行

當來日大難

野田黃雀行

門有萬里客

怨歌行

桂樹枝行

當牆欲高行

當欲遊南山行

當事君行

當車以駕行

飛龍篇

盤石行

驅車篇

卷第七

皇子生頌

玄俗頌

母儀頌

明賢頌

孔子廟頌

學官頌

社頌

宜男花頌

冬至獻襪頌

庖犧贊

女媧贊

神農贊

黃帝贊

少昊贊

顓頊贊

帝嚳贊

帝堯贊

帝舜贊

夏禹贊

殷湯贊

湯禱桑林贊

周文王贊

周武王贊

周成王贊

周公贊

漢高帝贊

漢文帝贊

漢武帝贊

漢景帝贊

姜嫄簡狄贊

禹妻贊

斑婕妤贊



吹雲贊

赤雀賦

巢父贊

務光贊

商山四皓贊

三鼎贊

承露盤銘

寶刀銘

卷第八

改封陳王謝恩章

封二子為公謝恩章

初封安鄉侯表

謝妻改封表

自試表

求自試表 二首

謝賜柰表

諫伐遼東表

獻璧表

獻文帝馬表

上牛表

謝鼓吹表

求通親親表

慶文帝受禪表 二首

上下太后誄表

黃初五年令

上責躬詩表

龍見表

冬至獻襪頌表

上先帝賜鎧表

卷第九

誥咎文

釋愁文

七啓

九詠

柳頌序

與司馬仲達書

與楊德祖書

與吳季重書

任城王誄

大司馬曹休誄

光祿大夫荀侯誄

平原懿公主誄  
武帝誄

文帝誄

卞太后誄

金瓠哀辭

行女哀辭

仲雍哀辭

王仲宣誄

卷第十

漢二祖優劣論  
相論

魏德論  
辯道論

藉田說  
令禽惡鳥論

魏德論謳  
穀  
禾  
鵠  
鳩

髑髏說

曹子建集目錄終

曹子建集卷第一

東征賦 并序

魏陳思王曹

植 撰



建安十九年王師東征吳寇余典禁兵衛官  
省然神武一舉東夷必克想見振旅之盛故  
作賦二篇

登城隅之飛觀兮望六師之所營  
幡旗轉而心異兮舟楫動而傷情  
顧身微而任顯兮愧任重而命輕  
嗟我愁其何為兮心遙思而懸

旌師旅憑皇穹之靈佑兮亮元勳之必舉揮  
朱旗以東指兮橫大江而莫御

游觀賦

靜間居而無事將遊目以自娛登北觀而啓  
路涉雲際之飛除從羆熊之武士荷長戟而  
先驅罷若雲歸會如霧聚車不及回塵不獲  
舉奮袂成風揮汗如雨

懷親賦

并序

濟陽南澤有先帝故營遂停駕造斯賦焉

猶平原而南驚覩先帝之舊營步壁壘之常  
制識旌旗之所停在官曹之典列心髣髴於  
平生回驥首而永游赴脩途以尋遠情眷戀  
而顧懷魂須臾而九反

玄暢賦

并序

夫富者非財也貴者非寶也或有輕爵祿而  
重榮聲者或有反性命而徇功名者是以孔  
老異情楊墨殊義聊作賦名曰玄暢  
夫何希世之大人罄天壤而作皇該仁聖之

上義據神位以統方補五常之漏闕綴三代  
以維綱僥余生之倖祿邁九二之嘉祥上同  
契於稷高降合穎於伊望思薦寶以繼佩怨  
和璞之始鑄思黃鍾以協律怨伶葢之不存  
嗟所圖之莫合悵蘊結而延佇希鵬舉以搏  
天蹶青雲而奮羽企駟躍而改駕任中才之  
展御望前軌而致策顧後乘而安驅匪逞邁  
之短脩長前貞而保素弘道德以爲宇築無  
怨以作藩溜慈惠以爲圃畊柔順以爲田不

媿景而慚魄言懸天之何欲逸千載而流聲  
超遺黎而度俗

幽思賦

倚高臺之曲隅處幽僻之閒深望翔雲之悠  
悠羗朝霽而夕陰顧秋華而零落感歲莫而  
傷心觀躍魚於南沼聆鳴鶴於北林搦素筆  
而慷慨揚大雅之哀吟仰清風以嘆息寄余  
思於悲絃信有心而在遠重登高以臨川何  
余心之煩錯寧翰墨之能傳

節遊賦

覽宮宇之顯麗實大人之攸居建三臺於前  
處飄飛陞以凌虛連雲閣以遠徑營觀榭於  
城隅亢高輕以回跳緣雲霓而結䟽仰西嶽  
之崧岑臨漳淦之清渠觀靡靡而無終何渺  
渺而難殊亮虛厚之所處非吾人之所廬於  
是仲春之月百卉叢生萋萋藹藹翠葉朱莖  
竹林青葱珍果含榮凱風發而時鳥謹微波  
動而水蟲鳴感氣運之和順樂時澤之有成

遂乃浮素蓋御驪駟命友生携同儔誦風人  
之所歎遂駕言而出遊步北園而馳騫庶翺  
翔以解憂望洪池之滉漾遂降集乎輕舟浮  
沉蟻於金壘行觴爵於好求絲竹發而響厲  
悲風激於中流且容與以盡觀聊永日而忘  
愁嗟羲和之奮迅怨曜靈之無光念人生之  
不永若春日之微霜諒遺名之可紀信天命  
之無常愈志蕩以滢游非經國之大綱罷曲  
宴而旋服遂言歸乎舊房

感節賦

携友生而游觀盡賓主之所求登高墉以永  
望冀消日以忘憂欣陽春之潛潤樂時澤之  
惠休望候鴈之翔集想玄鳥之來游嗟征夫  
之長勤雖處逸而懷愁懼天河之一回沒我  
身乎長流豈吾鄉之足顧戀祖宗之靈丘唯  
人生之忽過若鑿石之未燿慕牛山之哀泣  
懼平仲之我咲折若華之翳日庶朱光之常  
照願寄軀於飛蓬乘陽風之遠飄亮吾志之

不從乃拊心以嘆息青雲鬱其西翔飛鳥翩  
而止匿欲縱體而從之哀余身之無翼大風  
隱其四起揚黃塵之冥冥鳥獸驚以來群草  
木紛其揚英見遊魚之泔灑感流波之悲聲  
內紆曲而潛結心怛惕以中驚匪榮德之累  
身恐年命之早零慕歸全之明義庶不忝其  
所生

離思賦 并序

建安十六年大軍西討馬超太子留監國植

時從焉意有憶戀遂作離思賦云

在肇秋之嘉月將曜師而西旗余抱疾以賓  
從扶衡軫而不怡慮征期之方至傷無階以  
告辭念茲君之光惠庶沒命而不疑欲畢力  
於旌麾將何心而遠之願我君之自愛爲皇  
朝而寶已水重深而魚悅林脩茂而鳥喜

釋思賦 并序

家第出養族父郎中伊予以兄弟之愛心有  
戀然作此賦以贈之

彼翔友之離別猶求思乎白駒况同生之義  
絕重背親而爲踈樂鴛鴦之同池羨比翼之  
共林亮根異其何戚痛別榦之傷心

臨觀賦

登高墉兮望四澤臨長流兮送遠客春風暢  
而氣通靈草含幹兮木交莖丘陵崛兮松柏  
青南園夢兮果載榮樂時物之逸豫悲予志  
之長違歎東山之朔勤歌式微以訴歸進無  
路以効功退無隱以營私俯無鱗以遊遁仰



無翼以翻飛

曹子建集卷第一

曹子建集卷第二

潛志賦

魏陳思王曹植撰

潛大道以遊志希往昔之遐烈矯貞亮以作  
矢當苑囿之呈藝驅仁義以爲禽必信忠而  
後發退隱身以滅跡進出世而取容且摧剛  
而和謀接處肅以靜恭亮知榮而守辱匪狗  
天以爲通

閒居賦

何吾人之介特去朋正而無儔出靡時以娛  
志入無樂以消憂何歲月之若鶩復民生之  
無常感陽春之發節聊輕駕之遠翔登高丘  
以延企時薄暮而起雨仰歸雲以載奔遇蘭  
蕙之長圃冀芬芳之可服結春衡以延佇入  
虛廊之間館步生風之高廡踐密邇之修除  
即蔽景之玄宇翡翠翔於南枝玄鶴鳴於北  
野青魚躍於東沼白鳥戲於西渚遂乃背通  
谷對綠波藉文茵翳春華丹轂更馳羽騎相

過

慰子賦

彼凡人之相親小離別而懷戀况中殤之愛  
子乃千秋而不見入空室而獨倚對孤幃而  
切嘆痛人亡而物在心何忍而復觀日晡晚  
而既沒月代照而舒光仰列星以至晨衣霑  
露而含霜惟逝者之日遠愴傷心而絕腸

叙愁賦

并序

時家二女弟故漢皇帝聘以爲貴人家母見

二弟愁思故令予作賦曰

嗟妾身之微薄信未達乎義方遭母氏之聖  
善奉恩化之彌長迄盛年而始立脩女職於  
衣裳承師保之明訓誦六列之篇章觀圖像  
之遺形竊庶幾乎英皇委微軀於帝室充末  
列於椒房荷印紱之令服非陋才之所望對  
牀帳而太息慕二親以憎傷揚羅袖而掩涕  
起出戶而彷徨顧堂宇之舊處悲一別之異  
鄉

愁思賦

四節更王兮愁氣悲遙思倘恍兮若有遺原  
野蕭條兮煙無依雲高氣靜兮露凝璣野草  
變色兮莖葉稀鳴蜩抱木兮鴈南飛歸室解  
裳兮步庭前月光照懷兮星依天居一世兮  
芳景遷松喬難慕兮誰能仙長壽命也兮獨  
何愆

九愁賦

嗟離思之難忘心慘毒而含哀踐南畿之末

境越引領之徘徊捲浮雲以太息顧攀登而  
無階匪徇榮而愉樂信舊都之可懷恨時王  
之謬聽受奸枉之虛辭揚天威以臨下忽放  
臣而不疑登高陵而反顧心懷愁而荒悴念  
先寵之既隆哀後施之不遂雖危亡之不豫  
亮無遠君之心刈桂蘭而秣馬含余車於西  
林願接翼於歸鴻嗟高飛而莫攀因流景而  
寄言響一絕而不還傷時俗之趨險獨悵望  
而長愁感龍鸞而匿跡如吾身之不留竄江

介之曠野獨眇眇而沉舟思孤客之可悲改  
予身之翱翔豈天監之孔明將時運之無常  
謂內思而自策筭乃昔之愆殃以忠言而見  
黜信毋負於時王俗參差而不齊豈毀譽之  
可同競昏瞽以營私害予身之奉公共朋黨  
而妬賢俾予濟乎長江嗟大化之移易悲性  
命之攸遭愁慊慊而繼懷惟慘慘而情挽曠  
年載而不回長去君兮悠遠御飛龍之蜿蜒  
揚翠電之華旌絕紫霄而高鶩飄弭節於天

庭披輕雲而下觀覽九土之殊形顧南郢之  
邦壤咸蕪穢而倚傾驂盤桓而思服仰御驤  
以悲鳴行予袂而收涕僕夫感以失聲履先  
王之正路豈淫徑之可遵知犯君之招咎耻  
于媚而求親顧旋復之無軌長自棄於遐濱  
與麋鹿以爲群宿林藪之歲藁野蕭條而極  
望曠千里而無人民生期於必死何自苦以  
終身寧作清水之沉泥不爲濁路之飛塵踐  
蹊隧之危阻登岩堯之高岑見失群之離獸  
覲偏棲之孤禽懷憤激以切痛苦回忍之在  
心愁戚戚其無爲遊綠林而逍遙臨白水以  
悲嘯猿驚聽以失條亮無怨而棄逐乃余行  
之所招

娛賓賦

逐行賓而高會兮丹幃擘以四張辨中厨之  
豐膳兮作齊鄭之妍倡文人騁其妙說兮飛  
輕翰而成章談在昔之清風兮摠賢聖之紀  
綱欣公子之高義兮德芬芳其若蘭揚仁恩

於白屋兮踰周公之棄餐聽仁風以忘憂兮  
美酒清而有乾

愍志賦 并序

或人有好鄰人之女者時無良媒禮不成焉  
彼女遂行適人有言之於予者予心感焉乃  
作賦曰

竊托音於往昔迄來春之不從思同遊而無  
路情壅隔而靡通哀莫哀於永絕悲莫悲於  
生離豈良時之難俟痛予質之日虧登高樓

以臨下望所歡之攸居去君子之清宇歸小  
人之蓬廬欲輕飛而從之迫禮防之我居

歸思賦

背故鄉而遷徂將遙憇乎他濱經平常之舊  
居感荒壤而莫振城邑寂以空虛草木穢而  
荆藜嗟喬木之無陰處原野其何爲信樂土  
之足慕忽并日之載馳

靜思賦

夫何美女之爛妖紅顏擘而流光卓特出而

無足呈才好其莫當性通暢以聰惠行嬾密  
而妍詳蔭高岑以翳日臨綠水之清流秋風  
起於中林離鳥鳴而相求愁慘慘以增傷悲  
予安能乎淹留

曹子建集卷第二

曹子建集卷第三

魏陳思王曹植撰

感婚賦

陽氣動兮淑清百卉鬱兮含英春風起兮蕭  
條蟄蟲出兮悲鳴顧有懷兮妖嬈用騷首兮  
屏營登清臺以蕩志伏高軒而游情悲良媒  
之不顧懼歡媾之不成慨仰首而太息風飄  
飄以動纓

出婦賦

曲集卷三  
以才薄之陋質奉君子之清塵承顏色以接  
意恐踈賤而不親悅新婚而忘妾哀愛惠之  
中零遂隨頽而失望退幽屏於下庭痛一旦  
而見棄心忉忉以非驚衣入門之初服背床  
室而出征攀僕御而登車左右悲而失聲嗟  
冤結而無訴乃愁苦以長窮恨無愆而見棄  
悼君施之不終

洛神賦 并序

黃初三年余朝京師還濟洛川古人有言斯

水之神名曰宓妃感宋玉對楚王神女之事  
遂作斯賦其詞曰

余從京城言歸東藩背伊闕越轅轅經通谷  
陵景山日既西傾車殆馬煩爾乃稅駕乎蘅  
臯秣駟乎芝田容與乎陽

楊

一作林流盼乎洛

川於是精移神駭忽焉思散俯則未察仰以  
殊觀覩一麗人於岩之畔廼援御者而告之  
曰爾有覲於彼者乎彼何人斯若此之艷也  
御者對曰臣聞河洛之神名曰宓妃然則君



王之所見也無柰

一作

是乎其狀若何臣願

聞之余告之曰其形也翩若驚鴻婉若游龍

榮曜秋菊華茂春松髮髯兮若輕雲之蔽月

飄飄兮若流風之回雪遠而望之皎若太陽

升朝霞迫而察之灼若芙蓉

一作

出淥波穠

纖得衷

一作

脩短合度肩若削成腰如約素

延頸秀項皓質呈露芳澤無加鉛華弗御雲

髻峩峩脩眉聯娟丹唇外朗皓齒內鮮明眸

善睐輔靨承權環姿艷逸儀靜體閑柔情綽

態媚於語言竒服曠世骨像應圖披羅衣之

璀璨兮珥瑤碧之華裾戴金翠之首飾綴明

珠以耀軀踐遠遊之文履曳霧綃之輕裾微

幽蘭之芳藹兮步踟躕於山隅於是忽焉縱

體以傲以嬉左倚采旄右蔭桂旗攘皓腕於

神滸兮采湍瀨之玄芝余情悅其淑美兮心

振蕩而不怡無良媒以接歡兮托微波而通

辭願誠素之先達兮解玉珮以要之嗟佳人

之信脩羗習禮而明詩抗瓊瑋以和予兮指

潛淵而為期執眷眷之歛實兮懼斯靈之我  
欺感交甫之棄言兮悵猶豫而狐疑收和顏  
而靜志兮申禮防以自持於是洛靈感焉徙  
倚彷徨神光離合乍陰乍陽竦輕軀以鶴立  
若將飛而未翔踐椒塗之郁烈步蘅薄而流  
芳超長吟以永慕兮聲哀厲而彌長爾迺眾  
靈雜還命儔嘯侶或戲清流或翔神渚或採  
明珠或拾翠羽從南湘之二妃携漢濱之遊  
女嘆匏瓜之無匹兮詠牽牛之獨處揚輕桂

之猗一作綺靡兮翳脩袖以延竚體迅飛鳧飄

忽若神凌波微步羅襪生塵動無常則若危  
若安進止難期若往若還轉盼流精光潤玉  
顏含辭未吐氣若幽蘭華容婀娜令我忘餐  
於是屏翳收風川后靜波馮夷鳴鼓女媧清  
歌騰文魚以驚乘鳴玉鑿以偕逝六龍儼其  
齊首載雲車之容裔鯨鯢踊而夾轂水禽翔  
而為衛於是越北沚過南岡紆素領回清陽  
動朱唇以徐言陳交接之大綱恨人神之道

殊兮怨盛年之莫當抗羅袂以掩涕兮淚流  
襟之浪浪悼良會之永絕兮哀一逝而異鄉  
無微情以效愛兮獻江南之明璫雖潛處於  
太陰長寄心於君王忽不悟其所舍悵神霄  
而蔽光於是背下陵高足徃神留遺情想像  
顧望懷愁冀靈體之復形御輕舟而上泝浮  
長川而忘反思綿綿而增慕夜耿耿而不寐  
霑繁霜而至曙命僕夫而就駕吾將歸乎東  
路攬駢轡以抗策悵盤桓而不能去

### 愁霖賦

迎朔風而爰邁兮雨微微而逮行悼朝陽之  
隱曜兮怨北辰之潛精神結轍以盤桓兮馬  
躑躅以悲鳴攀扶桑而仰觀兮假九日於天  
皇瞻沈雲之泱泱兮哀吾願之不將又曰夫  
季秋之淫雨兮既彌日而成霖瞻玄雲之掩  
晻兮聽長空之淋淋中宵卧而歎息起飾帶  
而撫琴

### 喜霽賦

禹身逝於陽旰卒錫圭而告成湯感旱於殷  
時造桑林而敷誠動玉朝而雲披鳴鑿鈴而  
日陽北極以爲期吾將倍道而兼行

### 登臺賦

從明后之嬉遊聊登臺以娛情見天府之廣  
開觀聖德之所營建高殿之嵯峨浮雙闕乎  
太清立冲天之華觀連飛閣乎西城臨漳川  
之長流望衆果之滋榮仰春風之和穆聽百  
鳥之悲鳴天功怛其旣立家顛得而獲呈楊

仁化於宇內盡肅恭於上京雖桓文之爲盛  
豈足方乎聖明休矣美矣惠澤遠揚翼佐皇  
家寧彼四方同天地之矩量齊日月之輝光

### 九華扇賦

并序

昔吾先君常侍得幸漢桓帝賜方扇不方不  
圓其中結成文名曰九華其辭曰

有神區之名竹生不周之高岑對綠水之素  
波背玄澗之重深體虛暢以立榦播翠葉以  
成林形五籬而九華篋鯨解而縷分效虬龍

之蜿蟬法虹霓之氤氲因形致好不常厥儀  
方不應矩圓不中規隨皓腕以徐轉發惠風  
之寒微時氣清以方厲紛飄動兮純綺

寶刀賦

并序

建安中魏王命有司造寶刀五板以龍熊鳥  
雀爲識太子得一余弟饒陽侯各得一焉  
有皇漢之明后思明達而玄通飛文藻以博  
致揚武備以禦凶然後礪五方之石鑿以中  
黃之壤規圓景以定環攄神思而造象陸斷  
犀革水斷龍角輕繫浮截刀不織流踰南越  
之巨闕超有楚之泰阿寔真人之攸遇永天  
祿而是荷

車渠椀賦

惟新椀之所生于涼風之浚濱采金光之定  
色擬朝陽而發輝豐玄素之曄曄帶朱榮之  
葳蕤緼絲綸以肆采藻繁布以相追翩飄颻  
而浮景若驚鵠之雙飛隱神璞於西野彌百  
葉而莫希于時乃有篤厚神后廣被仁聲夷慕

義而重使獻茲寶於斯庭命公輸之巧匠窮  
妍麗之殊形華色粲爛文若點成鬱蒼雲蒸  
蜿蟬龍征光如激電影若浮星何神怪之巨  
偉信一覽而九驚雖離朱之聰目內炫耀而  
矢精何明麗之可悅超群寶而特章俟君子  
之閒燕酌甘醴於斯觥既娛情而可貴故求  
御而不忘

迷迭香賦

播西都之麗草兮應青春而凝暉流翠葉於  
纖柯兮結微根於丹墀信繁華之速實兮弗  
見凋於嚴霜芳莫秋之幽蘭兮麗崑崙之英  
芝既經時而收采兮遂幽殺以增芳去枝葉  
而特御兮入綃縠之霧裳附玉體以行止兮  
順微風而舒光

大暑賦

炎帝掌節祝融司方羲和按轡南雀舞衡蛇  
折鱗於靈窟龍解角於皓蒼遂乃溫風赫戲  
草木垂榦山折海沸沙融礫爛飛魚躍渚潛

龜浮岸鳥張翼而近栖獸交遊而雲散于時  
黎庶徙倚棊布葉分機女絕綜農夫釋耘背  
暑者不群而齊跡向陰者不會而成群於是  
大人遷居宅幽緩神育靈雲屋重構間房肅  
清寒泉涌流玄木奮榮積素冰於幽館氣飛  
結而為霜奏白雪於琴瑟朔風感而增涼

曹子建集卷第三

曹子建集卷第四

魏陳思王曹植撰

神龜賦 并序

龜壽千歲時有遺余龜者數日而死肌肉消  
盡唯甲存焉余感而賦之曰

嘉四靈之建德各潛位乎一方蒼龍虬於東  
嶽白虎嘯於西崗玄武集於寒門朱雀棲於  
南鄉順仁風以消息應聖時而後翔嗟神龜  
之奇物體乾坤之自然下夷方以則地上規

隆而法天順陰陽以呼吸藏景曜於重泉餐  
飛塵以實氣飲不竭於朝露步容趾以俯仰  
時鸞回而鶴顧忽萬載而不恤周無疆於太  
素感白龍之翔翥卒不免乎豫且雖見珍於  
宗廟懼剝剝之重辜欲愬怨於上帝將等愧  
乎游魚懼沈泥之逢殆赴芳蓮以巢居安玄  
雲而好靜不滯翔而改度昔嚴周之抗節援  
斯靈而托喻嗟祿運之屯蹇終遇獲於江濱  
歸籠檻以幽處遭淳美之仁人晝顧瞻以終  
日夕撫順而接晨邁淫災以殞越命勦絕而  
不振天道昧而未分神明幽而難燭黃氏沒  
於空澤松喬化於扶木虵折鱗於平皋龍脫  
骨於深谷亮物類之遷化疑斯靈之解殼

白鶴賦

嗟皓麗之素鳥兮含竒氣之淑祥薄幽林以  
屏處兮蔭重景之餘光狹單巢於弱條兮懼  
衝風之難當無沙棠之逸志兮欣六翮之不  
傷承邂逅之僥倖兮得接翼於鸞凰同毛衣



之氣類兮信休息之同行痛美會之中絕兮  
遘嚴灾而逢殃拜太息而祇懼兮抑吞聲而  
不揚傷本規之違忤悵離群而獨處恒竄伏  
以窮栖獨哀鳴而戢羽翼大綱之難結得奮  
翅而遠遊聆雅琴之清韻記六翮之末流

蟬賦

唯夫蟬之清素兮潛厥類乎太陰在盛陽之  
仲夏兮始遊豫乎芳林實澹泊而寡慾兮獨  
怡樂而長吟聲皦皦而彌厲兮似貞士之介

心內含和而弗食兮與衆物而無求棲高枝  
而仰首兮賴朝露之清流隱柔桑之稠葉兮  
快閒居而遁暑苦黃雀之作害兮患螂螳之  
勁斧冀飄翔而遠托兮毒蜘蛛之網罟欲降  
身而卑竄兮懼草蟲之襲予免衆難而弗獲  
兮遙遷集乎宮宇依名果之茂陰兮托脩幹  
以靜處有翩翩之狡童兮步容與於園圃體  
離朱之聰視兮姿才捷於獼猿條罔葉而不  
挽兮樹無榦而不緣翳輕驅而奮進兮跪側

足以自間恐余身之驚駭兮精曾睨而目連  
持柔竿之冉冉兮運微黏而我纏欲翻飛而  
逾滯兮知性命之長捐委厥體於庖夫熾炎  
炭而就燔秋霜紛以宵下晨風烈其過庭氣  
憊怛而薄軀足攀木而失莖吟嘶啞以沮敗  
狀枯槁以喪形辭曰詩歎鳴蜩聲嘒嘒兮盛  
陽則來大陰逝兮皎皎貞素侔夷節兮帝臣  
是戴尚其潔兮

鸚鵡賦

美中州之令鳥越衆類之殊名感陽和而振  
翼遁太陰以存形遇旅人之嚴網殊六翮之  
無遺身挂滯於重籠孤鶯鳴而獨歸豈予身  
之足惜憐衆雛之未飛分靡軀以潤鑊何全  
濟之敢希蒙含育之厚德奉君子之光輝怨  
身輕而施重恐往惠之中虧常戢心以懷懼  
雖處安其若危永哀鳴其報德庶終來而不  
疲

鸚鵡賦 并序

鶻之爲禽猛氣其鬪終無勝負期於必死遂  
賦之焉

美遐忻之偉鳥生大行之崑阻體貞剛之烈  
性亮乾德之所輔戴毛角之雙立揚玄黃之  
勁羽其沈隕而重辱有節士之儀矩降居檀  
澤高處保岑遊不同嶺棲必異林苦有翻雄  
駭游孤鶻鶻翔則長鳴挑敵鼓翼專揚踰高  
越壑雙不隻僵階侍斯珥俯耀文墀成武官  
之首飾增庭燎之高暉

離繳鴈賦

并序

余游於武陵中有鴈離繳不能復飛顧命舟  
人追而得之故憐而賦焉

憐孤鴈之偏特情惆焉而內傷含中和之絕  
氣赴四節而征行遠玄冬於南裔避炎夏於  
朔方掛微軀之輕翼忽頽落而離群旅暗驚  
而鳴遠徒矯首而莫聞甘充君之下厨膏函  
牛之鼎鑊蒙生全之顧覆何恩施之隆博於  
是縱軀歸命無慮無求飢食稻梁渴飲清流

鷓鴣賦

曰鷓欲取雀雀言雀微賤身卑些少肌肉瘠瘦所得蓋少君欲相噉實不足飽鷓得雀言初不敢語頃來輒軻資糧之旅三日不食略思死鼠今日相得寧復置汝雀得鷓言意甚征營性命至重雀鼠貪生君得一食我命是傾皇天降鑑賢者是聽鷓得雀言意甚怛惋當死斃雀頭如果蒜不早首服烈頸大喚行人聞之莫不往觀雀得鷓言意甚不移目如

擘椒跳蕭二翅我當死矣略無可避鷓乃置雀良久方去二雀相逢似是公嫗相將入草共上一樹仍叙本末辛苦相語而共出爲鷓所捕賴我翻捷體素便附說我辨語千條萬句欺恐舍長令兒大怖我之得免復勝於死自今徙意莫復相妬

蝙蝠賦

曰吁何奸氣生茲蝙蝠形殊性詭每變常式行不由足氣不假翼明伏暗動盡似鼠形謂

鳥不似二足爲毛飛而含齒巢不哺鷇空不  
浮子不容毛群斥逐羽族下不蹈陸上不馮  
木

芙蓉賦

覽百卉之英茂無斯華之獨靈結脩根於重  
壤泛清流而擢莖其始榮也皦若夜光尋扶  
桑其揚暉也晃若九陽出暘谷芙蓉蹇產齒  
菖星屬絲條垂珠丹榮吐綠焜焜韡韡爛若  
龍燭觀者終朝情猶未足於是狡童媛女相

與同遊擢素手於羅袖接紅葩於中流

酒賦

并序

余覽楊雄酒賦辭甚瑰瑋頗戲而不雅聊作  
酒賦粗究其終始賦曰

嘉儀氏之造思亮茲美之獨珍仰酒旗之景  
曜協嘉號於天辰穆生以醴而辭楚侯羸感  
爵而增深其味有宜城醪醴蒼梧縹清或秋  
藏冬發或春醞夏成或雲拂潮涌或素蟻浮  
萍爾乃王孫公子遊俠翱翔將承芬以接意

會陵雲於朱堂獻酬交錯宴咲無方於是飲  
者並醉縱橫誼譁或揚袂屢舞或扣劍清歌  
或嘖嗽辭觴或奮爵橫飛或歎驪駒既駕或  
稱朝露未晞於斯時也質者或文剛者或仁  
卑者忘賤窶者忘貧於是矯俗先生聞之而  
歎曰噫夫言何容易此乃滛荒之源非作者  
之事若耽于觴酌流情縱逸先王所禁君子  
所斥

槐賦

羨良木之華麗爰獲貴於至尊憑文昌之華  
殿森列峙乎端門觀朱櫺之振條據文陛而  
結根暢沉陰以博覆似明后之垂恩在季春  
以初茂踐朱夏而乃繁覆陽精之炎景散流  
耀以增鮮

植橘賦

有朱橘之珍樹于鶉火之遐鄉稟太陽之烈  
氣嘉杲日之休光體天然之素分不遷徙于  
殊方播萬里而遙植列銅爵之園廷背江川

之暖氣處玄翔之肅清邦換壤別爰用喪生  
處彼不凋在此先零朱實不卸焉得素榮惜  
寒暑之不均嗟華實之永乖仰凱風以傾葉  
異炎氣之所懷颺鳴條以流響希越鳥之來  
栖夫靈德之所感物無微而不和神蓋幽而  
易激信天道之不訛既萌根而弗幹諒結葉  
而不華漸玄化而弗變非彰德於邦家附微  
條以嘆息哀草木之難化

述行賦

尋曲路之南隅觀秦政之驪墳哀黔首之罹  
毒酷始皇之爲君濯余身於秦井溫泉也律湯  
液之若焚

曹子建集卷第四

曹子建集卷第五

公宴

魏陳思王曹

植撰

公子敬愛客終宴不知疲清夜遊西園飛蓋  
相追隨明月澄清影列宿正參差秋蘭被長  
坂朱華冒綠池潛魚躍清波好鳥鳴高枝神  
飈接丹轂輕輦隨風移飄飄放志意千秋長  
若斯

侍太子坐



白日曜青春時雨靜飛塵寒氷辟炎景涼風  
飄我身清醴盈金觴餚饌縱橫陳齊人進竒  
樂歌者出西秦翩翩我公子機巧忽若神

七哀

明月照高樓流光正徘徊上有愁思婦悲歎  
有餘哀借問歎者誰言是宕子妻君行踰十  
年孤妾常獨棲君若清路塵妾若濁水泥浮  
沉各異勢會合何時諧願爲西南風長逝入  
君懷君懷良不開賤妾當何依

鬪鷄

遊目極妙伎清聽厭宮商主人寂無爲衆賓  
進樂方長筵坐戲客鬪鷄觀間房群雄正翕  
赫雙翹自飛揚揮羽邀清風悍目發朱光紫  
落輕毛散嚴距往往傷長鳴入青雲扇翼獨  
翱翔願蒙狸膏助常得擅此場

元會

初歲元祚吉日惟良乃爲佳會宴此高堂衣  
裳鮮潔黼黻玄黃珍膳雜環充溢圓方俯視

文軒仰瞻華梁願保茲喜千載為常歡笑盡  
娛樂哉未央皇家榮貴壽考無疆

送應氏二首

步登北邙

一作芒

阪遙望洛陽山洛陽何寂寞

宮室盡燒焚垣墻皆頓擗荆棘上參天不見  
舊耆老但覩新少年側足無行逕荒疇不復  
田遊子久不歸不識陌與阡中野何蕭條千  
里無人煙念我平生親

一作常居

氣結不能言

又

清時難屢得嘉會不可常天地無終極人命  
若朝霜願得展嫵婉我友之朔方親昵並集  
送置酒此河陽中饋豈獨薄賓飲不盡觴愛  
至望苦深豈不愧中腸山川阻且遠別促會  
日長願為比翼鳥施翮起高翔

雜詩六首

高臺多悲風朝日照北林之子在萬里江湖  
迥且深方舟安可極離思故難任孤鴈飛南  
游過庭長哀吟翹思慕遠人願欲托遺音形

影忽不見翩翩傷我心

其二

轉蓬離本根飄飄隨長風何意迴飈舉吹我  
入雲中高高上無極天路安可窮類此游客  
子捐軀遠從戎毛褐不掩形薇藿常不充去  
去莫復道沈憂令人老

其三

西北有織婦綺縞何繽紛明晨秉機杼日晷  
不成文太息終長夜悲嘯守青雲妾身入空

閨良人行從軍自期三年歸今已歷九春飛  
鳥遶樹翔噉噉鳴索群願爲南流景馳光見  
我君

其四

南國有佳人容華若桃李朝游北海一作江北岸  
夕宿瀟湘汜時俗薄朱顏誰爲發皓齒俯一作  
俛仰歲將暮榮耀難久恃

其五

僕夫早嚴駕吾行將遠遊遠遊欲何之吳國

爲我仇將聘萬里塗東路安足由江介多悲  
風淮泗馳急流願欲一輕濟惜哉無方舟閑  
居非吾志甘心赴國憂

其六

飛觀百餘尺臨牖御櫺軒遠望周千里朝夕  
見平原烈士多悲心小人媮一作媮自閒國讎  
亮不塞甘心思喪元拊劔西南望思欲赴太  
山絃急悲聲發聆我慷慨言

喜雨

天覆何彌廣苞育此群生棄之必憔悴惠之  
則滋榮慶雲從北來鬱迭西南征時雨終夜  
降長雷周我廷喜種盈膏壤登秋必有成

離友

并序

鄉人有夏侯威者少有成人之風余尚其爲  
人與之昵好王歸振旅送予于魏邦心有眷  
然爲之隕涕乃作離友之詩其辭曰

王旅遊兮背故鄉彼君子兮篤人綱媮予行  
兮歸朔方馳原隰兮尋舊疆載車奔兮馬繁

驥涉浮濟兮泛輕航迄魏都兮息蘭房展宴  
好兮惟樂康

應詔

肅承明詔應會皇都星陳夙駕秣馬脂車命  
彼掌徒肅我征旅朝發鸞臺夕宿蘭渚芒芒  
原隰祁祁士女經彼公田樂我稷黍爰有膠  
木重陰匪息雖有餼糧飢不遑食望城不過  
面色不游僕夫警策平路是由玄駟藹藹揚  
鑣漂沫流風翼衡輕雲承蓋涉澗之濱綠山

之隈遵彼河澣黃坂是階西濟關谷或降或  
升駢駟倦路載寢載興將朝聖皇匪敢晏寧  
弭節長驚指日遄征前驅舉燧後乘抗旌輪  
不輟運鸞無廢聲爰暨帝室稅此西墉嘉詔  
未賜朝覲莫從仰瞻城闕俯惟闕庭長懷永  
慕憂心如醒

贈徐幹

驚風飄白日忽然歸西山圓景光未滿衆星  
粲以繁志士營世業小人亦不閒聊且夜行

游游彼雙闕間文昌鬱雲興迎風高中天春  
鳩鳴飛棟流焱激櫺軒顧念蓬室士貧賤誠  
足憐薇藿弗充虛皮褐猶不全慷一作慨有  
悲心興文自成篇寶棄怨何人和氏有其愆  
彈冠俟知己知己誰不然良田無晚歲膏澤  
多豐年亮懷璵璠美積久德愈宣親交義在  
敦申章復何言

贈丁儀

初秋涼氣發庭樹微銷落凝霜依玉除清風

飄飛閣朝雲不歸山霖雨成川澤黍稷委疇  
隴農夫安所獲在貴多忘賤爲恩誰能博狐  
白足禦冬焉念無衣客思慕延陵子寶劍非  
所惜子其寧爾心親交義不薄

贈王粲

端坐苦愁思攬衣起西遊樹木發春華清池  
激長流中有孤鴛鴦哀鳴求匹儔我願執此  
鳥惜哉無輕舟欲歸忘古道顧望但懷愁悲  
風鳴我側羲和逝不留重陰潤萬物何懼澤

不周誰令君多念遂一作自使懷百憂

贈丁儀王粲

從軍度函谷驅馬過西京山岑一作峯高無極

涇渭揚濁清壯哉帝王居住佳麗殊百城負闕

浮出雲承露槩泰清皇佐揚天惠四海無交

兵權家雖愛勝全國爲令名君子在末位不

能歌德聲丁生怨在朝王子歡自營難一作歡

怨非貞則中和誠可經

贈白馬王彪四首

謁帝承明廬逝將歸舊疆清晨發皇邑日夕

過首陽伊洛廣且深欲濟川無梁汎舟越洪

濤怨彼東路長顧瞻戀城闕引領情內傷太

谷何寥廓山樹鬱蒼蒼霖雨泥我塗流潦浩

縱橫中逵絕無軌改轍登高崗脩坂造雲日

我馬玄以黃玄黃猶能進我思鬱以紆鬱紆

將難進親愛在離居本圖相與偕中更不克

俱鳴臯鳴衡軌豺狼當路衢蒼蠅間白黑讒

巧令親踈欲還絕無蹊攢轡止踟躕踟躕亦

何留相思無終極秋風發微涼寒蟬鳴我側  
原野何蕭條白日忽西匿歸鳥赴喬林一作木  
翩翩厲羽翼孤獸走索群銜草不遑食感物  
傷我懷撫心長太息太息將何爲天命與我  
違奈何念同生一往形不歸孤魂翔故域一作  
城靈柩寄京師存者忽復一作已過亡歿身自  
衰人生處一世去若朝霞晞年在桑榆間影  
響不能追自顧非金石咄嗚令心悲心悲動  
我神棄置莫復陳丈夫志四海萬里猶比隣

恩愛苟不虧在遠分日親何必同衾幃然後

展慙慙憂思成疾疢

一作疾

無乃兒女仁倉卒

骨肉情能不懷苦辛苦辛何慮思天命信可

疑虛無求列仙松子久吾欺變故在斯須百

年誰能持離別永無會執手將何時王其愛

玉體俱享黃髮期收淚即長路援筆從此辭

### 贈丁翼

嘉賓填城闕豐膳出中厨吾與二三子曲宴  
此城隅秦箏發西氣齊瑟揚東謳肴來不虛



歸觴至反無餘我豈狎異人朋友與我俱大  
國多良材譬海出明珠君子義休倚小人德  
無儲積善有餘慶榮枯立可須滔蕩固大節  
世俗多所拘君子通大道無願爲世儒

朔風

仰彼朔風用懷魏都願騁代馬倏忽北徂凱  
風永至思彼蠻方願隨越鳥翻飛南翔四氣  
代謝懸景運周別如俯仰脫若三秋昔我初  
遷朱華未希今我旋止素雪云飛俯降千仞

仰登天阻風飄蓬飛載離寒暑千仞易陟天  
阻可越昔我同袍今永乖別子好芳草豈忘  
爾貽繁華將茂秋霜悴之君不垂眷豈云其  
誠秋蘭可喻桂樹冬榮絃歌蕩思誰與銷憂  
臨川慕思何爲泛舟豈無和樂游非我鄰誰  
忘汎舟愧無榜人

矯志

芳樹雖香難以餌烹尸位素餐難以成名磁  
石引鐵於金不連大朝舉士愚不聞焉抱壁

塗乞無爲貴寶履仁違禍無爲貴道駕離遠  
害不羞卑棲靈虬避難不耻污泥都蔗雖甘  
杖之必折巧言雖美用之必滅濟濟唐朝萬  
邦作孚逢蒙雖巧必得良弓聖主雖知必得  
英雄螳螂見嘆齊士輕戰越王軾蛙國以死  
獻道遠知驥世僞知賢覆之壽之順天之矩  
澤如凱風惠如時雨口爲禁闕舌爲發機門  
機之關楛矢不追

閨情二首

攬衣出中閨逍遙步兩楹閒房何寂寞綠草

被堦庭空穴

一作室

自生風百鳥翔南征春思

安可忘憂戚與君并佳人在遠道妾身單且

榮歡會難再逢

一作遇

芝蘭不重榮人皆棄舊

愛君豈若平生寄松爲女蘿依水如浮萍齋

身奉衿帶朝夕不墮

一作憤

傾儻終顧盼恩

一作

儻願終

永副我中情

有一美人被服織羅妖姿艷麗蒼若春華紅  
顏鞞擘雲髻嵯峨彈琴撫節爲我絃歌清濁

齊均既亮且和取樂今日遑恤其他

三良

功名不可爲忠義我所安秦穆先下世三臣  
皆自殘生時等榮樂既沒同憂患誰言捐軀  
易殺身誠獨難攬涕登君墓臨穴仰天歎長  
夜何冥冥一往不復還黃鳥爲悲鳴哀哉傷  
肺肝

責躬

於穆顯考時惟武皇受命于天寧濟四方朱

旗所拂九土披攘玄化滂流荒服來王超商  
越周與唐比蹤篤生我皇亦世載聰武則肅  
烈文則時雍受禪于漢君臨萬邦萬邦既化  
率由舊章廣命懿親以藩王國帝曰爾侯君  
茲青土奄有海濱方周于魯車服有輝旗章  
有叙濟濟雋乂我弼我輔伊爾小子恃寵驕  
盈舉挂時網動亂國經作藩作屏先軌是隳  
傲我皇使犯我朝儀國有典刑我削我黜將  
寘于理元兇是率明明天子時惟篤類不忍

我刑暴之朝肆違彼執憲哀予小子改封充  
邑于河之濱股肱弗置有君無臣荒淫之闕  
誰弼余身瑩瑩僕夫于彼冀方嗟予小子乃  
罹斯殃赫赫天子恩不遺物冠我玄冕要我  
朱紱光光天使我榮我華剖符授玉王爵是  
加仰齒金璽俯執聖策皇恩過隆祗承怵惕  
咨我小子頑克是嬰逝慙陵墓存愧闕庭匪  
敢傲德寔恩是恃威靈改加足以沒齒昊天  
罔極生命不圖常懼顛沛抱罪黃墟願蒙矢  
石建旗東嶽庶立毫釐微功自贖危軀授命  
知足免戾甘赴江湘奮戈吳越天啓其衷得  
會京畿遲奉聖顏如渴如飢心之云慕愴矣  
其悲天高聽卑皇肯照微

情詩

微陰翳陽景清風飄我衣游魚潛綠水翔鳥  
薄天飛眇眇客行士徭役不得歸始出嚴霜  
結今來白露晞遊者嘆黍離處者歌式微慷  
慨對嘉賓悽愴內傷悲

妬

嗟爾同衾曾不是志寧彼冶容安此妬忌

芙蓉池

逍遙芙蓉池翩翩戲輕舟南揚雙栖鵠北柳  
有鳴鳩

雜詩

悠悠遠行客去家千餘里出亦無所之入亦  
無所止浮雲翳日光悲風起動地

言志

慶雲未時興雲龍潛作魚神鸞失其儔還從  
燕雀居

七步詩

煮豆燃豆其豆在釜中泣本是同根生相煎  
何太急

曹子建集卷第五

曹子建集卷第六

魏陳思王曹

植撰

筮篥引

署酒高殿上親友從我遊中厨辦豐膳烹羊  
宰肥牛秦箏何慷慨齊瑟和且柔陽阿奏竒  
舞京洛出名謳樂飲過三爵緩帶傾庶羞主  
稱千金壽賓奉萬年酌久要不可忘薄終義  
所尤謙謙君子德罄折何所求驚風飄白日  
光景馳西流盛時不再來百年忽我道生存

華屋處零落歸山丘先民誰不死知命復何  
憂

升天行 二首

乘躋追術士遠之蓬萊山靈液飛素波蘭桂  
上參天玄豹遊其下翔鷗戲其巔乘風忽登  
舉彷彿見衆仙

扶桑之所出乃在朝陽谿中心凌蒼昊布葉  
蓋天涯日出登東幹旣夕沒西枝願得紆陽  
轡回日使東馳

僊人篇

僊人攬六著對博太山隅湘娥拊琴瑟秦女  
吹笙竽玉樽盈桂酒河伯獻神魚四海一何  
局九州安所如韓終與王喬要我於天衢萬  
里不足步輕舉凌太虛飛騰踰景雲高風吹  
我軀迴駕觀紫薇與帝合靈符閶闔正嵯峨  
雙闕萬丈餘玉樹扶道生白虎夾門樞驅風  
遊四海東過王母廬俯觀五嶽間人生如寄  
居潛光養羽翼進趨且徐徐不見軒轅氏乘

升一作龍出鼎湖徘徊九天上與爾長相須

妾薄命 二首

携玉手喜同車比上雲閣飛除釣臺蹇產清  
虛池塘觀沼可娛仰汎龍舟綠波俯擢神草  
枝柯想彼宓妃洛河退詠漢女湘娥

日月既逝西藏更會蘭室洞房華燈步障舒  
光皎若日出扶桑促樽合坐行觴主人起舞  
盜盤能者穴觸別端騰觚飛爵闌干同量等  
色齊顏任意交屬所歡朱顏發外形蘭袖隨

禮容極情妙舞仙仙體輕裳解履遺絕纓俛  
仰笑喧無呈覽持佳人玉顏齊舉金爵翠盤  
手形羅袖良難腕弱不勝珠環坐者歎息舒  
顏御巾裊粉君傍中有霍納都梁鷄舌五味  
雜香進者何人齊姜恩重愛深難忘召延親  
好宴私但歌盃來何遲客賦既醉言歸主人  
稱露未晞

白馬篇

白馬飾金羈連翩西北馳借問誰家子幽并



游俠兒少小去鄉邑揚聲一作名沙漠垂宿昔

秉良弓楛矢何參差控弦破左的右發摧月

支仰手接飛猱疑作鴻俯身散馬蹄狡捷過猴

猿勇剽若豹螭邊城多警急虜騎一作胡虜數遷

移羽檄從北來厲馬登高堤長驅蹈匈奴左

顧陵鮮卑棄身鋒刃端性命安可懷父母且

不顧何言子與妻名在一作編壯士籍不得中

顧私捐軀赴國難視死忽如歸

名都篇

名都多妖女京洛出少年寶劍直千金被服

麗且鮮鬪雞東郊道走馬長楸間馳騁未能

半雙兔過我前攬弓捷鳴鏑長驅上南山左

挽因右發一縱兩禽連餘巧未及展仰手接

飛鳶觀者咸稱善衆工歸我妍我歸宴平樂

美酒斗十千膾鯉膾胎鰕炮鼈炙熊蹯鳴儔

嘯匹侶列坐竟長筵連翩擊鞠壤巧捷惟萬

端白日西南馳光景不可攀雲散還城邑清  
晨復來還

薤露行

天地無窮極陰陽轉相因人居一世間忽若  
風吹塵願得展功勤輸力於明君懷此王佐  
才慷慨獨不羣鱗介尊神龍走獸宗麒麟蟲  
獸豈知德何況於士人孔氏刪詩書王業粲  
已分騁我逕寸翰流藻垂華芬

豫章行 二首

窮達難豫圖禍福信亦然虞舜不逢堯耕耘  
處中田太公未遭文漁釣終渭川不見魯孔

丘窮困陳蔡間周公下白屋天下稱其賢

又

鴛鴦自朋

一作用

親不若比翼連他人雖同盟

骨肉天性然周公穆康叔管蔡則流言子臧  
讓千乘季扎慕其賢

美女篇

美女妖且閑採桑岐路間柔條紛冉冉落葉  
何翩翩攘袖見素手皓腕約金環頭上金爵  
釵腰佩翠琅玕明珠交玉體珊瑚間玉

一作木

難羅衣何飄飄輕裾隨風還顧盼遺光彩長  
嘯氣若蘭行徒用息駕休者以忘餐借問女  
何居乃在城南端青樓臨大路高門結重關  
容華耀朝日誰不希令顏媒氏何所營玉帛  
不時安佳人慕高義求賢良獨難衆人徒噉  
噉安知彼所觀盛年處房室中夜起長歎

豔歌

出自薊北門遙望湖池桑枝枝自相值葉葉  
自相當

遊僊

人生不滿百歲歲少歡娛意欲奮六翮排霧  
凌紫虛蟬蛻同松喬翻跡登鼎湖翱翔九天  
上騁轡遠行遊東觀扶桑曜西臨弱水流北  
極玄天渚南翔陟丹丘

五遊詠

九州不足步願得凌雲翔逍遙八紘外游目  
歷遐荒披我丹霞衣襲我素霓裳華蓋芬旛  
藹六龍仰天驤曜靈未移景倏忽造昊蒼閭

闔啓丹扉雙闕曜朱光徘徊文昌殿登陟太  
微堂上帝休西櫺羣后集東廂帶我瓊瑤佩  
漱我沆瀣漿踟躕玩靈芝徙倚弄華芳王子  
奉僊藥羨門進竒方服食享遐紀延壽保無  
疆

梁甫行

一云泰山梁甫行

八方各異氣千里殊風雨劇哉邊海民寄身  
於草墅妻子象禽獸行止依林阻柴門何蕭  
條狐兔翔我宇

丹霞蔽日行

紂爲昏亂虐殘忠正周室何隆一門三聖牧  
野致功天亦革命漢祚之興秦階之衰雖有  
南面王道陵夷炎光再幽忽滅無遺

怨歌行

爲君旣不易爲臣良獨難忠信事不顯乃有  
見疑患周公佐成王金滕功不刊推心輔王  
室二叔反流言待罪居東國泣涕常流連皇  
靈大動變震雷風且寒拔樹偃秋稼天威不

可于素服開金滕感悟求其端公旦事既顯  
成王乃哀嘆吾欲竟此曲此曲悲且長今日  
樂相樂別後莫相忘

善哉行

來日大難口燥唇乾今日相樂皆當喜歡經  
歷名山芝草翩翩仙人王喬奉藥一丸自惜  
袖短內手知寒慙無靈轍以救趙宣月沒參  
橫北斗闌干親友在門飢不及餐

君子行

君子防未然不處嫌疑間瓜田不納履李下  
不整冠叔嫂不親授長幼不並肩和光得其  
柄謙恭甚獨難周公下白屋吐哺不及餐一  
沐三握髮後世稱聖賢

平陵東

閭闔開天衢通被我羽衣乘飛龍乘飛龍與  
僊期東上蓬萊採靈芝靈芝採之可服食年  
與王父無終極

苦思行

綠羅緣玉樹光耀燦相暉下有兩真人舉翅  
翻高飛我心何踴躍思欲攀雲追鬱鬱西嶽  
巔石室青青與天連中有耆年一隱士鬚髮  
皆皓然策杖從我遊教我忘言

遠遊篇

遠遊臨四海俯仰觀洪波大魚若曲陵乘浪  
相經過靈鼈戴方丈神嶽儼嵯峨僊人翔其  
隅玉女戲其阿瓊蓋可療飢仰首吸朝霞崑

崙本吾宅中州非我家將歸謁東父一舉超  
流沙鼓翼舞時風長嘯激清歌金石固易弊  
日月同光華齊年與天地萬乘安足多

吁嗟篇

吁嗟此轉蓬居世何獨然長去本根逝宿夜  
無休閒東西經七陌南北越九阡卒遇回風  
起吹我入雲間自謂終天路忽然下沉泉驚  
飈接我出故歸彼中田當南而更北謂東而  
反西宕若當何依忽亡而復存飄飄周八澤

連翩歷五山流轉無恒處誰知吾苦艱願爲  
中林草秋隨野火燔糜滅豈不痛願與株荜  
連

鰕鮒篇

鰕鮒游潢潦不知江海流燕雀戲藩柴安識  
鴻鵠游世士誠明性一作世事大德固無儔  
駕言登五嶽然後小陵丘俯觀上路入勢利  
惟是謀讎高念皇家遠懷柔九州撫劔而雷  
音猛氣縱橫浮汎泊徒嗷嗷誰知壯士憂

種葛篇

種葛南山下葛藟自成陰與君初婚時結髮  
恩意深懽愛在枕席宿昔同衣衾竊慕棠棣  
篇好樂如瑟琴行年將晚莫佳人懷異心思  
紀曠不接我情遂抑沉出門當何顧徘徊步  
北林下有交頸獸仰見雙栖禽攀枝長歎息  
淚下沾羅衿良馬知我悲延頸對我吟昔爲  
同池魚今爲商與參往古皆懽遇我獨困於  
今棄置委天命悠悠安可任

浮萍篇

浮萍寄清水隨風東西流結髮辭嚴親來爲  
君子仇恪勤在朝夕無端獲罪尤在昔蒙恩  
惠和樂如瑟琴何意今摧頽曠若商與參茱  
萸自有芳不若桂與蘭新人雖可愛不若故  
人歡行雲有反期君恩儻中還慊慊仰天歎  
愁心將何愬日月不恒處人生忽若遇悲風  
來入帷一作懷淚下如垂露散一作發篋造新一作  
裳衣裁縫紈與素

惟漢行

太極定二儀清濁始以形三光照八極天道  
甚著明爲人立君長欲以遂其生行仁章以  
瑞變故誠驕盈神高而聽卑報若響應聲明  
主敬細微三季嘗天經二皇稱至化盛哉唐  
虞庭禹湯繼厥德周亦致太平在昔懷帝京  
日昃不敢寧濟濟在公朝萬載馳其名

當來日大難

日苦短樂有餘乃置玉樽辦東厨廣情故心



相於闔門置酒和樂欣欣遊馬後來轅車解  
輪今日同堂出門異鄉別易會難各盡杯觴

野田黃雀行

高樹多悲風海水揚其波利劍不在掌結友  
何須多不見籬間雀見鷄自投羅羅家得雀  
喜少年見雀悲拔劍捎羅網黃雀得飛飛飛  
飛摩蒼天來下謝少年

門有萬里客

門有萬里客問君何鄉人寒裳起從之果得

心所親挽衣對我泣太息前自陳本是朔方  
士今為吳越民行行將復行去去適西秦

怨歌行一首七解晉曲所奏

明月照高樓流光正徘徊上有愁思婦悲嘆  
有餘哀一解

借問嘆者誰自云宕子妻夫行踰十載賤妾  
常獨棲二解

念君過於渴思君劇於飢君為高山栢一作  
妾為濁水泥三解

北風行蕭蕭烈烈入吾耳心中念故人淚墮  
不能止 四解

浮沉各異路會合當何諧願作東北風吹我  
入君懷 五解

君懷常不開賤妾當何依恩情中道絕流止  
任東西 六解

我欲竟此曲此曲悲且長今日樂相樂別後  
莫相忘 七解

桂之樹行

桂之樹桂之樹桂生一何麗佳楊朱華而翠  
葉流芳布天涯上有棲鸞下有蟠螭桂之樹  
得道之真人咸來會講僊教爾服食日精要  
道甚省不煩淡泊無爲自然乘蹻萬里之外  
去留隨意所欲存高高上際於衆外下下乃  
窮極地天

當墻欲高行

龍欲升天湏浮雲人之仕進侍中人衆口可  
以鑠金讒言三至慈母不親憤憤俗間不辨

偽真願欲披心自說陳君門以九重道遠河  
無津

當欲遊南山行

東海廣且深由卑下百川五嶽雖高大不逆  
垢與塵良木不十圍洪條無所因長者能博  
愛天下寄其身大匠無棄材船車用不均錐  
刃各異能何所獨卻前嘉善而矜愚大聖亦  
同然仁者各壽考四坐咸萬年

當事君行

人生有所貴尚出門各異情朱紫更相奪色  
雅鄭異音聲好惡隨所愛憎追舉逐聲名百  
心可事一君巧詐寧拙誠

當車以駕行

歡坐玉殿會諸貴客侍者行觴主人離席顧  
視東西廂絲竹與鞞鐸不醉無歸來明燈以  
繼夕

飛龍篇

晨遊太山雲霧窈窕忽逢二童顏色鮮好乘

彼白鹿手翳芝草我知真人長跪問道西登  
玉堂一作臺金樓復道授我僊藥神皇所造教  
我服食還精補腦壽同金石永世難老

盤石篇

盤石山巔石飄颻澗底蓬我本泰山人何爲  
客淮東蒹葭彌斥土林木無芬重岼巖若崩  
缺湖水何洶洶蚌蛤被濱涯光彩如錦虹高  
彼凌雲霄浮氣象螭龍鯨脊若丘陵鬚若山  
上松呼吸喬船櫂澎濤戲中鴻方舟尋高價

珍寶麗以通一舉必千里乘颶舉帆幢經危  
履險阻未知命所鍾常恐沈黃墟下與鼃鼈  
同南極蒼梧野游眇窮九江中夜指參辰欲  
師當定從仰天長太息思想懷故邦乘桴何  
所志吁嗟我孔公

驅車篇

驅車揮駑馬東到奉高城神哉彼泰山五嶽  
專其名隆高貫雲蜺嗟峨出太清周流二六  
候間置一二亭上有涌醴泉玉石揚華英東

北望吳野西眺觀日精魂神所繫屬逝者感  
斯征王者以歸天效厥元功成歷代無不遵  
禮記有品程探策或長短唯德享利貞封者  
七十帝軒皇元獨靈餐霞漱沆瀣毛羽被身  
形發舉蹈虛廓徑庭升窈冥同壽東父年曠  
代永長生

曹子建集卷第六

程